

Efile–Mukulu a kufukama

« Anka Efile-Mukulu a kufukama yawa babushiishe mulami (**Katshunga**) a mikooko mukata ku bafwe, mu (bukome bwa) mase a kilombeeno kya yikalayika, fumwetu Yesu, enwikashe bakumbane mu kikitshino kyoso kibuuwa, bwa kukita kikyebe ky'Eshimba dyaye, mu kulombasha kwanudi kyakya kilumbulukye kumpala kwaye, kukidila kwi Yesu Kilisto, kwadi'ye, kwikale ntumbo ku bipwa na bipwa ! Amene ». (Bena Ebeleo 13 : 20-21)

Yesu Kilisto kufukama kwetu

Fumu Yesu, mulami (**Katshunga**) mukata a Mikoko « bakitshine (batwesheshe) kufukama ku mase a ku nkuluse aaye ».

(Bena Kolose 1 : 20)

Fumu Yesu mwitufutshile ebasa, pabaadi mwipane mwanda a milwisho yetu. Mukandu wibuwa : « kuwuuka'shi su obwela kukanwa koobe'shi Yesu ni fumu na su okumiina mwishimba dyobe'shi Efile-Mukulu bamubushiishe ku bafwe, okapashibwa ... Mwanda bifundwe abyamba'shi : ooso akumiina mwandji takakwatshiswa buufu nya, mwanda ooso akayitanyina eshina dya Mwanana akapashiibwa ». (Looma 10 : 9-11,13)

« Ngi pa wawa mwanda, sumbulaayi butete booso na bubi booso, tambulaayi na kufukama eyi dikuniibwe, diina bukome bwa kupaasha bikudi byenu. Anka fubilayi eyi na kushii penda kwidipusha mu kulubakana anwe banabeene ». (Shake 1 :21-22)

Mpolo afundjila bena Fidipi « Byabya byanudi nabyo na byanudi bayiye, na bapete, na bapushe, na bamone mwandji, kitaayi bino bintu, na Efile-Mukulu a kufukama akekala nenu ».

(Bena Fidipi 4 :9)

© C.E.R.S. - B.P. 1673 Kananga
République Démocratique Du Congo

Email: 33eme.cers.lit@gmail.com

<http://www.33eme-cers.org/>

KUFUKAMA N'EFILE-MUKULU



Mushindu wi bantu bashi n'Efile-Mukulu

Bu byabidi bifundwe'shi : « takwi mululame suunga umune, suunga ngumune tekwanka ; mwanda booso mbalwishe na be kula na ntumbo y'Efile-Mukulu ».

(Looma 3 : 10,23)

Mpolo afundjila bena Efeso : « mu aa mafuku nubaadi kushii Kilisto, kushii mu Isalele na beeni ku bilombeeno bya mulayilo, bashii lukulupilo, na bashii n'Efile-Mukulu pa senga. Anka binobino, mu Kilisto Yesu, anwe babaadi kala kula, nubaseshiibwa peepi mu mase a Kilisto. Mwanda ni naaye kufukama kwetu ».

(Bena Efeso 2 : 12-14)

Fumu Yesu bafikile, « bwakumunika kwi baaba bashaale mu mufito na mwesheshi wa lufu, bwa kukunkusha ngawo yeetu mwishinda dya kufukama ».

(Luuka 1 : 79)

Fumu Yesu « bakitshine (batwesheshe) kufukama ku mase a ku nkuluse aaye ».

(Bena Kolose 1 : 20)

« Mwanda'shi Kilisto, pabatudi tatwi na bukome, ku kipindji kilombane, bafwidiile babi. Mwanda nka paapa, pa mwanda wa mululame, muntu mupwandjikiile kufwa, mwanda'shi pa mwanda wa muntu e buwa, anka Efile-Mukulu bashinkamisha kifulo kyaye nabeene kwatudi, kwamba'shi, patudi tukii balwishi, Kilisto bafwiile pa mwanda weetu ».

(Looma 5 :6 -8)

Anka bu abyakula namu Dafidi bwa kukanyibwa kwa muntu abadikilwa kululama kw'Efile-Mukulu kushii mikitshino : « baasha mwabi ni mbaaba babalekyeelwa bilubilo byabo na baasha milwisho yibabwikiilwa ! Sha mwabi nka yawa muntu shabadikilwa mulwisho kwi Mwanana ! »

(Looma 4 :6-8 ; Loono 32 : 1,2)

« Pakwikala babingishebwe pa lukumiino, twina kufukama n'Efile-Mukulu mu fumwetu Yesu Kilisto ».

(Looma 5 :1)

Kufukama kw'Efile-Mukulu

« Kupopeela kwenu kuwukiibwe kwi bantu booso ; Fumu taadi peepi, tanwikalanga na lukalakashi lwa kintu suunga nkimune, anka mu bintu byoso tuulaayi nkalo yeenu kwi Efile-Mukulu mu nteko na kwiambiila, na lutumbu, na kufukama kw'Efile-Mukulu, kwakwa kukile kinangu kyoso, akukalama mashimba enu na nangunangu yeenu mu Kilisto Yesu ».

(Bena Fidipi 4 : 5-7)

Fumu Yesu akula'shi : « Fikaayi kwandji anwe booso bakookye na basha mashito, n'ami, nankenupa kwikisha. Semunayi mushiyo wande, nuyiye kwandji ; mwanda wandji na kwiyisha na kupopeela kwishimba ; n'anwe anukapete kwikisha kwa bikudi byenu. Mwanda mushiyo wande ngupelepee, na kiita kyande nkipelepee ».

(Mateo 11 : 28-30)

Kufukama kw'eyendo

Yesu akula'shi : « Anka Musambi, Kikudi-E-Selele, akikatumwa kwi Yaya mwishina dyande, aye, akenulambukisha bintu byoso na akenutentekyesha bintu byoso binanenulungwile. Nenulekyela kufukama ; nenupa kufukama kwande ; ami ntanenupe bu abipeyeshena bena senga nya. Eshimba dyenu taditshinkishibwanga suunga kwikala na moo nya ».

(Yoano 14 :26-27)

« Nutekye nteko mu bipaso byoso, na kwisendeela, mu bipindji byoso, mu kikudi na kwikala bapasukye mu byabya na kukanka-manana koso na kwiyya bwa bee selele ».

(Bena Efeso 6 : 18)

« Anka byabya namu Kikudi etukwasha mu kubofula kwetu ; mwanda t'atuwuku kilombeene kuteka buu byabikyebe ; anka Kikudi nabeene etutekyelaa na kwiambiila kwatushii bya kupatuula, na yawa awuku bii mu mashimba awuku kii kinangu kya Kikudi, atekyela bee selele, muyile abikumina Efile-Mukulu ; Mwanda atushinguula'shi bintu byoso abifubu kumune pa mwanda wa biya bya baaba ben'Efile-Mukulu kifulo, biya bya baaba babayitanyine muyile mpango yaye ».

(Looma 8 : 26-28)